

rium, atque votis solemnibus susceptis, felicia et salutaria quaequae ominantur. Gaudia, plausus, gratulationes vbique audiuntur. Festi autem celebritas et pompa, vel ab eloquentissimis, describi nequit. Iuvat in aliis rebus semper, atque omnino necessaria est, prisca frugalitas: hic saluberrimum, ad stuporem usque omnium, aperitur copiae cornu. Aurea valet in rebus aliis mediocritas: hic nullus laetitiae modus, aut terminus esse debet. Quamuis etiam summa sint vbique locorum iubila: minora tamen sunt, quam ut Nuptiis Augustissimis, earundemque felicitati, sufficiant: quae Principum largam promittunt feriem, et amplissima ciuibus simul omnibus incrementa, nullis temporum iniuriis minuenda, pollicentur. Propter auspiciatissimas OPTIMORVM PRINCIPVM nuptias templa precibus atque hymnis personant. Voluptatibus curiae et tribunalia afficiuntur. Summa laetitia vrbes implentur. Iucundo luminum splendore oppida, vici, rura, collucent. Neque solum Brunouicenses, Luneburgenses, Hassiacae, et quotquot Principum Celsissimorum imperio subiectae, regiones illius tanti gaudii magnitudinem continent; verum et longe lateque per omnes prouincias totius Europae semet eius vbertas diffundit. Nec immerito liberalioris disciplinae studiosa iuuentus vbique locorum, vt exercitationibus vacat iucundissimis, ad vota et congratulationes se applicat. Quammaxime vero in huius gaudii societatem Rintelienses veniunt Musae, quae plausuum certamine publico, et communi patriae laetitia, sibi temperare non possunt, quin eam suis quoque orationibus adiuuarent, summamque huius temporis festiuitatem, imo fortunam tot populorum exoptatissimam et Principum suorum nuptias laetis ac faustis omnibus prosequerentur. Dabis hoc, CONIUGVM PAR SERENISSIMVM, nobis, vt iubilis tripudiisque gaudia comitemur Tua. Cadmi et Harmoniae olim quoque nuptiis Musae cum reliquis Diis interfuerunt, quarum